

N^o16080

10-10-17

საქართველოს პარლამენტის ბიუროს წევრებს

ქალბატონებო და ბატონებო!

მოგახსენებთ, რომ ა.წ. 7-21 სექტემბერს საქართველოს პარლამენტისა და სს „საპარტნიორო ფონდის“ ერთობლივი დელეგაციის შემადგენლობაში ოფიციალური ვიზიტით ვიმყოფებოდი ჩინეთის სახალხო რესპუბლიკაში. დელეგაციის შემადგენლობაში აგრეთვე იყვნენ: ადამიანის უფლებათა დაცვის კომიტეტის თავმჯდომარე სოფიო კილაძე, გარემოს დაცვისა და ბუნებრივი რესურსების კომიტეტის თავმჯდომარის პირველი მოადგილე ზაზა ხუცუშვილი, ჩინეთ-საქართველოს მეგობრობის საპარლამენტო ჯგუფის წევრები თეიმურაზ ჭკუასელი და ალექსანდრე ქანთარია, აღმასრულებელი ხელისუფლებისა და სს „საპარტნიორო ფონდის“ წარმომადგენლები.

დელეგაცია სტუმრობდა სამ პროვინციას: შენსი (ქ. სიანი), ძიანსი (ქ. ნანჩანი), გუანდუნი (ქ. გუანჯოუ და შაოგუანი) და ცენტრალური დაქვემდებარების ორ ქალაქს: შანხაი და პეკინი.

ჩინეთის უძველეს დედაქალაქ სიანში, დელეგაციამ მონაწილეობა მიიღო „აბრეშუმის გზა 2017-ის ბიზნეს სამიტში“, რომელშიც მსოფლიოს 70-მდე ქვეყნის 600-ზე მეტი დელეგატი მონაწილეობდა. სამიტის მთავარი თემა ეკონომიკური გლობალიზაცია, პარტნიორ ქვეყნებს შორის სავაჭრო-ეკონომიკური თანამშრომლობის გაღრმავება, „ერთი სარტყელი, ერთი გზის“ ინიციატივაში კერძო სექტორის ჩართულობის გაძლიერება, ფინანსური პლატფორმის ჩამოყალიბება და საუკუნის პროექტის სტრატეგიული გეგმის განხილვა იყო. დელეგაციამ მონაწილეობდა მრგვალ მაგიდაში, რომლის დროსაც საუბარი შეეხო საქართველოს საინვესტიციო შესაძლებლობებს, „აბრეშუმის გზის“ ინიციატივის ფარგლებში ინვესტიციების მოზიდვის საკითხს, ასევე ვაჭრობისა და გლობალური განვითარების ასპექტებს.

ქალაქ ნანჩანში დელეგაციამ მოინახულა ქართული კულტურის და ღვინის ცენტრი „ჯუნგე“, ცენტრის შენობაში განლაგებული ქართული ქართული ღვინის მუზეუმი და მაღაზიები. შედგა საქმიანი შეხვედრები ქალაქ ნანჩანის მერთან და ძიანსის პროვინციის გუბერნატორთან, აგრეთვე მსხვილი სამშენებლო კომპანია Zhongmei Engineering Group-ისა და სარკინიგზო კომპანია Jiangxi Railway Investment Group Corporation-ის პირველ პირებთან.

ქალაქ გუანჯოუში დელეგაცია დაესწრო საქართველოს სავაჭრო-სამრეწველო პალატისა და სს „საპარტნიორო ფონდის“ ერთობლივი წარმომადგენლობის გაიხსნის

ოფიციალურ ცერემონიას. საქართველოდან ჩასული სტუმრების გარდა, ცერემონიაში პროვინციის ხელისუფლების, მმართველი პარტიისა და ბიზნეს-სექტორის წარმომადგენლები მონაწილეობდნენ. წარმომადგენლობა ინვესტიციების მოზიდვას, ჩინეთ-საქართველოს შორის სავაჭრო-ეკონომიკური ურთიერთობის გაღრმავებასა და ერთობლივი პროექტების განხორციელებას შეუწყობს ხელს, პოპულარიზაციას გაუწევს საქართველოს საინვესტიციო გარემოსა და შესაძლებლობებს.

გუანდუნის პროვინციაში დელეგაცია აგრეთვე სტუმრობდა ჩინეთის ინოვაციური ტექნოლოგიების (დრონების) უმსხვილეს კომპანიას Ehang Innovation Technology Co. და შაოდუნის მეტალურგიულ კომბინატს.

ქალაქ შანხაიში დელეგაცია ხუასინის ენერჯეტიკულ კორპორაცია CEFC-ის პირველ პირებს შეხვდა. მოლაპარაკებების შედეგად გადაწყდა დაფუძნდეს ერთობლივი ფონდი, რომელიც თანხებს საქართველოს ინფრასტრუქტურის, ენერჯეტიკის, სოფლის მეურნეობის, მრეწველობის, ინდუსტრიის, ტურიზმისა და სხვა სფეროებში დააბანდებს. CEFC-ის მმართველი გუნდი და ქართული მხარე შანხაის ოფისში გამართულ ოფიციალურ შეხვედრაზე, ჩინეთში ქართული პროდუქციის ექსპორტის ხელშეწყობასა და სასაწყობე მეურნეობებით უზრუნველყოფის თაობაზე შეთანხმდნენ. აქცენტები გაკეთდა საქართველოში თავისუფალი ინდუსტრიული ზონების განვითარების საკითხზე. კერძოდ, საუბარი შეეხო ფოთის ეკონომიკურ ზონას, რომლის აქტიური ამუშავება ქვეყნის ეკონომიკისთვის მნიშვნელოვანია.

შანხაიში კერძო სექტორის პარალელურად, დელეგაციამ შეხვედრები ადგილობრივ ხელისუფლებასთან გამართა. შანხაის მთავრობის საგარეო საქმეთა დეპარტამენტის თავმჯდომარესთან, ფუ ლიხუნთან შეხვედრაზე საუბარი შეეხო საქართველოს საინვესტიციო შესაძლებლობების, თბილისისა და შანხაის დამეგობრებისა და ქალაქებს შორის პირდაპირი ავიარეისების დანიშვნის საკითხებს.

დედაქალაქ პეკინში პარლამენტის დელეგაცია დაესწრო სს „საპარტნიორო ფონდისა“ და ჩინეთის უმსხვილესი ექსპორტისა და კრედიტების სადაზღვევო კორპორაცია SinoSure-ის ერთობლივი მემორანდუმის საზეიმო ხელმოწერის ცერემონიას. მემორანდუმი გულისხმობს სხვადასხვა საინვესტიციო პროექტების ერთობლივი დაფინანსების მექანიზმების შემუშავებას, ინფორმაციისა და გამოცდილების ურთიერთგაზიარებას ისეთ სფეროებში, როგორცაა სამთო გადამამუშავება, სოფლის მეურნეობა, მშენებლობა, ენერჯეტიკა, ტრანსპორტი და ვაჭრობა.

ვიზიტის ბოლოს შედგა შეხვედრები ჩინეთის სახალხო რესპუბლიკის მმართველი პარტიის ლოდერებთან, მათ შორის პარტიის ცენტრალური კომიტეტის საერთაშორისო საქმეთა დეპარტამენტის ვიცე-თავმჯდომარე შინ ფეი ლისთან, აღმოსავლეთ ევროპისა და ევრაზიის დეპარტამენტის თავმჯდომარე ციან ნა ჩენთან, ჩინეთის რეფორმებისა და განვითარების კომიტეტის მთავარ ექსპერტებსა და სხვა თანამდებობის პირებთან. შეხვედრების ერთ-ერთი მთავარი თემა საუკუნის პროექტში „ერთი სარტყელი - ერთი გზა“ საქართველოს როლის გამოკვეთა, ფუნქციების მკვეთრად

განსაზღვრა და კონკრეტული ამოცანების დასახვა იყო. დიდი ყურადღება დაეთმო საქართველო-ჩინეთს შორის პირდაპირი ავიარეისების დანიშვნის, ერთობლივი ეფექტური პროექტების განხორციელების, ქართული პროდუქციის ექსპორტის ზრდის, სავაჭრო-ეკონომიკურ და ტურიზმის სფეროში თანამშრომლობის გაღრმავების საკითხებს.

საერთო ჯამში ვიზიტმა მეგობრულ და საქმიან ვითარებაში ჩაიარა, რაც ხელს შეუწყობს ურთიერთობების გაღრმავებას მსოფლიოს ისეთ მნიშვნელოვან სახელმწიფოსთან, როგორცაა ჩინეთი.

პატივისცემით,

გიორგი მოსიძე

